

續
文
獻
通
考

續文獻通考卷之五十九

皇明進士雲間王圻纂輯

學校考 幸學養老 三氏學

幸學

宋

理宗淳祐元年帝謁孔子遂臨太學御崇化堂命祭酒曹
鳳講禮記大學篇監學官各進一秩諸生推恩賜帛有
差以紹定三年所制伏羲堯舜禹湯文武周孔顏曾思
孟道統十三贊就賜國子監宣示諸生復親書朱熹白
鹿洞規賜焉 景定二年詔皇太子謁孔子于太學手
詔畧曰虎闥齒曹太子事也此禮廢久矣如設奠舍菜

之事我朝未嘗廢也然敦師敬道又不可拘舊制可令
太子謁拜焉太子既謁孔子還即上奏曰臣恭奉聖旨
擇用正月十五日令臣謁拜先聖文宣王於太學臣仰
體聖心祇承嚴訓區區愚衷因而感發焉蓋先聖之道
至我朝盛時運際文明真儒迭起而後有以續夫孟氏
之傳然其時諸說並駕未知統一迨乾淳間文公臣朱
熹與宣公臣張栻成公臣呂祖謙志同道合合切惻講磨
如義利之辨如近思錄之書擇精語詳開牖後學誠有
功于聖門中間邪說又幾晦蝕陛下聖德奮興罷斥詖
邪表章正學然後人心一正聖道大明天下學士得沿
淵源而溯洙泗實萬世無疆之休今熹已秩從祀而栻

祖謙尚未奉明詔臣竊望焉從之 四年正月詔曰周
尊黃耆忠厚所基漢事三老祿養無缺陳埜林彬之史
季溫夙被擢用今皆耆年奉祀歲久宜示獎崇陳埜授
端明殿學士林彬之寶謨閣待制史季溫直華文閣各
因其祠 五年詔郡縣行鄉飲之禮

度宗咸淳三年車駕幸學棧謁先聖命講中庸畢執經官
陳宗禮講經官雷宜中各轉一級

遼聖宗統和十二年正月霸州民李在宥年百三十有三
賜束帛錦袍銀帶仍復其家 十六年六月詔婦人年
踰九十者賜物 太平四年二月詔賜諸官分耆老食
道宗大安十年十二月三河縣民孫賓及其妻皆百歲復

其家

金海陵天德三年四月沂州男子吳真犯法當死有司以其母老疾無侍爲請命官與養濟者爲令

世宗大定十六年十二月詔諸流移人老疾者官與養濟
二十五年四月詔會寧府百姓年七十以上者補一
官九月次轄沙河賜百歲老嫗帛 甲申次遼水召見
百二十歲女直老人能道太祖開創事上嘉嘆賜食并
賜帛

元

世祖至元時順天路民王住兒過誤致死罪其母年七十
言於朝曰兒死則妾亦死矣乃宥其罪俾養母

成宗大德九年六月立皇子德壽爲皇太子詔賜高年帛八十者一匹九十者二匹親年七十別無侍丁者從近遷除

武宗至大二年三月賜大都路民年九十者二千三百三十一人人帛二匹八十者八千三百三十一人人帛一匹

文宗至順二年四月寧國路涇縣民張道殺人爲盜道弟吉從而不加功拘囚七年不決毋老無他子孫中書省臣以聞勅免死杖而黜之俾養其母

順帝至元四年正月詔內外廉能官父母年七十無侍丁者附近銓注以便侍養至正元年十二月詔民年八

十以上蒙古人賜緡帛二表裏其餘州縣旌以高年耆德之名免其家雜役 八年帝臨國子學賜衍聖公銀印陞秩從二品定弟子員出身及省親奔喪制

按順帝每事驕奢不恤國政而獨於臨太學之事差近人情此由其人欲雖多而天理間有萌動之機耳

皇明

國朝南雍初建 大駕數臨位置規圖一由淵畫廟學旣成復躬行釋菜之禮皮弁執圭再拜而後奠爵仍再拜而退崇祀之重前古莫及焉且躬 御講筵延禮司成坐講堂上親爲論說旣 諭戒師生復 賜宴竟口乃返儒均光寵未始前聞 列聖遵承踐祚之初必舉斯

典至我 世宗獨臨幸至再秩禮興敎屢渙 天章尤
近伐所未覩也

太祖洪武十五年禮部及儒臣奏定 視學儀前期一日
有司灑掃殿堂設 御幄於大成門東上南向設 御
座於彝倫堂至日學官率諸生迎 駕於成賢街左
駕至學官及諸生俯伏叩頭興 駕入櫺星門止於大
成門外 上入 御幄禮官入奏請具皮弁服次請行
禮導引官導 上出 御幄就 御位百官各就位導
引官導 上詣盥洗位搢圭盥悅出圭詣酒尊所酌酒
詣 先師神位前再拜百官皆再拜搢圭執事官跪進
爵 上獻爵授執事官奠於神位前出圭再拜百官皆

再拜四配十哲兩廡分獻如常儀導引官導 上入

御幄易常服升輿詣學學官率諸生先列於堂下東西
上至藝倫堂 升御座贊唱學官諸生行禮五拜三
叩頭東西序立於堂下三品以上及侍從官以次入堂
東西序立贊進講祭酒司業博士助教四人以次升堂
由西門入至中堂贊舉經案於 御前禮部官奏請授
經於講官祭酒跪受 賜講官坐乃以經置講案叩頭
就西南隅設几榻坐講 賜大臣及翰林儒臣坐皆叩
頭序坐於東西諸生圍立以聽講畢祭酒叩頭退就本
位司業博士助教各以次進講畢出堂門復位贊唱有
制學官諸生列班俱北面跪聽 宣諭五拜叩頭禮

畢學官率諸生出成賢街跪候 駕還明日祭酒率學
官上表謝 恩 是年十二月復 幸學先是五月丁
巳 上謂禮部尚書劉仲質曰 國學新成朕將釋菜
令諸儒議禮議者曰孔子雖聖人臣也禮宜一奠而再
拜朕以爲孔子明道德以教後世豈可以職位論哉昔
周太祖入孔子祠將拜左右曰孔子陪臣不宜拜周太
祖曰百世帝王之師敢不拜乎遂再拜 朕深嘉其明
斷不惑於左右之言今 朕有天下敬禮百神於先師
之禮宜加尊仲質乃與儒臣定議 上服皮弁服執圭
詣先師再拜獻爵後又再拜退易服詣彝倫堂祭酒司
業博士助敎進講 賜坐侍臣以次坐於東西講畢

宣諭學官諸生而還明日祭酒率學官上表謝 恩

上從之己未遣官祭先師孔子以太牢禮畢祭酒吳顥

等升堂諸生受業乙丑 上遂幸國子監謁先師孔子

釋菜禮成退 御講筵祭酒吳顥等以次講畢 上謂

之曰中正之道無踰於儒上古聖人不以儒名而德行

實儒後世儒之名立雖有儒名或無其實孔子生於周

末身儒道行儒行立儒教率天下後世之人皆欲其中

正惜乎魯國君臣無能用之者當時獨一公父文伯之

母知其賢責其子之不能從則一國君臣可愧矣卿等

爲師表正當以孔子之道爲教使諸生咸趨乎正則

朝廷得人矣復 命取尚書大禹臯陶謨洪範 親爲

講說反覆開諭群臣聞者莫不悚悅遂賜宴竟日而
還丙寅祭酒吳鵬率博士龔穀等上表謝各賜羅衣
二襲官民生許恒等四百三十人各賜春夏布衣

成祖永樂四年三月辛卯朔辛學先是勅諭禮部曰
朕惟孔子帝王之師帝王爲生民之主孔子立生民之
道三綱五常之理治天下之大經大法皆孔子明之以
教萬世天下不可一日無生民生民不可一日無孔子
之道朕皇考太祖聖神文武欽明啓運峻德成功統
天大孝高皇帝膺君師億兆之任正中夏文明之統復
衣冠禮樂之舊渡江之初首建學校祀孔子御經筵
講書守帝王之心法繼聖賢之道學集其大成以臻至

治 朕承鴻業惟 皇考之成憲是遵今春時和躬詣
太學如 皇考故事稱 朕崇儒重道治安天下之意
布告群臣咸使聞之爾禮部擇日舉行其合行禮儀禮
部詳議以聞故 勅禮部尚書鄭賜言宋制謁孔子服
靴袍再拜 上曰見先師禮不可簡必服皮弁行四拜
禮於是進 視學儀注即洪武中所定也是日 上親
行釋菜禮 命吏部尚書蹇義戶部尚書夏原吉翰林
院學士解縉祭酒胡儼分獻十哲兩廡畢 上御彝倫
堂 命坐講祭酒胡儼講尚書堯典司業張智講易泰
卦大臣及翰林院詞官皆 賜坐講畢宣 諭曰六經
聖人之道彌綸天地昭揭日月垂憲萬世率由彝訓與

卿等皆勉之遂 命光祿寺 賜百官茶次日早祭酒
胡儼等上表及箋稱謝 賜祭酒以下宴於 奉天門
監生宴於 丹墀仍 賜儼及司業張智紵絲羅衣人
二襲學官王峻用等三十五人紵絲衣人一襲監生朱
璫等三千七十四人鈔各五錠時禮部會試舉人中式
者璫第一故璫爲諸生班首云壬辰 命工部修 太
祖高皇帝 詔書碑亭禮部奏立視學之碑 上親爲
製文 在南京國子監

朕惟帝王之興必首舉學校之政以崇道德弘教化正
人心成天下之才致天下之治唐虞三代之盛率由於
茲後世之君其學政或修或否是以不古若也我 皇

考聖神文武欽明啓運峻德成功統天大孝高皇帝龍
飛淮甸渡江首建學校親祀孔子日引儒臣講論經義
求古聖人之道身體力行既統有萬方即 詔府州縣
皆立學天下士子雲集京師復新作廟學於鷄鳴山之
陽親製教條頒布中外又 命天下增廣生員復其家
府州縣皆用春秋有事孔子賜以樂舞德教廣被海外
諸國及蠻夷酋長並遣子入學教化之隆視古爲盛
朕續承太統仰遵成憲乃永樂四年三月朔日躬詣廟
庭謁先師孔子前期三日而將事之夕霧雲澄霽星緯
昭明旣旦天宇穆清旭日鮮嚴含菜廟庭退即彝倫堂
文武群臣咸侍左右師儒在席諸生序列堂下 命祭

酒胡儼等以次講經成禮乃還夫學以明道也道之體
廣大光明配乎天地日月而其實不離乎彝倫日用之
間孔子明之上以承堯舜禹湯文武之傳下以爲後世
植綱常開太平於無窮而世之極其尊崇之體者非於
孔子有所增益特以著明其道之至天下不可一日而
無也惟我 皇考繼統帝王尊師孔子舉天下皆約之
使由於斯道是以治化之盛淪洽周徧薄海內外固不
嚮風慕義 朕景仰宏謨夙夜祇敬思維繼承之道不
敢怠遑爰因視學謹叙述 皇考所以致隆治化之本
勒碑於廟俾我子孫臣庶尚克欽承於斯萬年

英宗正統九年 幸學儀注先是二月十五日 勅禮部

曰國家建學不隆文教以圖化理今太學新成朕將
祇謁先師孔子勸勵師生爾禮部其擇日具禮儀以聞
禮部具上儀注

前期一日太常寺整理祭儀國子監灑掃殿堂錦衣衛
設御幄於大成門東上南向設御座於彝倫堂正
中鴻臚寺設經案於堂內之左至日置書於上設講案
於堂西南錦衣衛設鹵簿教坊司設大樂俱於午門
外百官朝退先詣國子監門外迎駕陪祀官先詣國
子監具祭服伺候行禮駕出鹵簿大樂以次導行樂
設而不作是日早太常寺陳設祭儀於各神位前設酒
罇爵如常儀設上拜位於先師神位前正中其日學

官率諸生迎 駕於成賢街上 駕至學宮及諸生跪
俯伏叩頭興學官陪祀行禮諸生先由太學東西小門
入列於堂下東西序立 駕入櫺星門鹵簿大樂俱止
門外 上至大成門入 御幄禮官入奏請具皮弁服
次奏請行禮導引官導 上出 御幄由中道詣大成
殿陛下典儀唱執事官各司其事執事官先酌酒於爵
候導引 上至拜位贊奏就位百官亦各就位四配十
哲分獻官各詣殿陛東西階下兩廡分獻官各詣廡前
俱北向立贊奏 上鞠躬拜興拜興平身通贊百官行
禮同贊奏稽主 上稽主執事官跪進爵 上受爵獻
畢復授執事官奠於神位前奏出主 上出主四配十

哲兩廡分獻官以次詣神位前奠爵訖仍以次出殿外
東西向立贊奏 上鞠躬拜興拜興平身通贊百官行
禮同導引官導 上由中道出分獻官以次退 上入
御幄易常服訖禮官奏請 幸彝倫堂 上升輿禮
官前導由櫺星門出從太學門入學官先分列於諸生
前 駕至學官諸生跪候 駕過然後起仍前序立百
官分列堂外稍上左右侍立 上至彝倫堂升 御座
贊學官諸生行五拜叩頭禮東西序立堂下三品官以
上及翰林院學士升堂執事官各以次序立贊進講祭
酒司業以次升堂由東西小門入至堂中執事官舉案
於 御前禮官奏請授經於講官祭酒跪受 上賜讀

官坐乃以經置講案叩頭就西南隅几榻坐講 上賜
武官都督以上文官三品以上及翰林院學士坐皆叩
頭序坐於東西諸生圍立以聽祭酒李時勉講帝庸作
歌與畢陶磨歌一章講畢叩頭退就本位司業趙琬進
講周易文言如儀畢出堂門復位贊唱有 制學官諸
生列班俱北面跪聽宣 諭曰聖人之道具在六經躬
行圖治君臣所同尚能勉之宣 諭畢贊行五拜叩頭
禮畢學官諸生以次退先從東西小門出仍於成賢街
右列班伺候尚膳監進茶 御前 上命光祿寺 賜
各官茶畢各官退列堂門外叩頭序立 駕興升輿由
太學門出升輦鹵簿大樂前道樂作 駕出太學門學

官諸生俟 駕至晚叩頭退百官常服先詣 午門外
伺候 駕還鹵簿大樂止於門外 上御 奉天門鳴
鞭百官常服鴻臚寺致詞行慶賀禮鳴鞭畢 駕興還
宮百官退明日國子監祭酒率學官監生上表謝 恩
上具皮弁服 御奉天殿錦衣衛設 丹陛駕百官
朝服侍班行禮畢 上易服於 奉天門禮官引奏
賜祭酒司業及學官衣服諸生鈔錠祭酒司業紵絲衣
一襲羅衣一襲諸學官紵絲衣一襲監生每人鈔五錠
駕還是日 上親御奉天門 賜武官公侯駙馬伯
都督以上文官三品以上及翰林院官祭酒司業監丞
博士助教學正學錄宴又明日祭酒司業率學官監生

復謝恩

景皇帝景泰二年二月初三日 幸學前期月日 勅禮部 朕惟帝王之道莫先於宗孔子 朕將祇謁廟庭躬修祀禮退臨太學勸勵師生以丕隆文教於天下爾禮部其擇日具儀注以聞本年正月初八日禮部擇日具儀注題奏奉 聖旨是講官并學官添與紗帽帶監生每人添與絹一疋着陳懋于謙王直陳循高穀江淵商輅劉鉉分獻於是欽天監選擇景泰二年二月初二日辛未宜用卯時吉餘同前是日祭酒蕭鉉講書經畢陶篇天聰明一章司業趙琬講周易泰卦象辭

憲宗成化元年 幸學儀注

一欽天監選擇成化元年三月初十日丁巳宜用辰時吉餘俱同前惟前期一日太常寺設大成樂器於殿上列樂舞生於階下之東西至進爵時樂作上受爵獻畢復授執事官奠于神位前樂止贊出圭上出圭四配十哲兩廡分獻官以次詣神位前奠爵訖仍出殿門外東西向立典儀唱送神樂作樂止贊上鞠躬拜興拜興平身禮官奏請幸彝倫堂講畢宣諭曰聖人垂法具載六經爾師生各宜進修以輔我文明之治尚其勉之次日謝恩賜祭酒司業學官及孔顏孟三氏子孫衣服諸生鈔錠是日賜宴武官都督以上文官三品以上翰林院學士及祭酒司業學官三氏子孫

與宴 一前期各衙門辦事監生俱各取回迎 駕觀

禮 一 賜孔顏孟三氏子孫襲封衍聖公紵絲衣一

套犀帶一條五經博士顏議孟希文俱紵絲衣一套帶

一條各與紗帽一頂其餘族人各與素線絲衣一套帶

一條 賜講官每人紵絲衣一套羅衣一套學官每人

紵絲衣一套監生每名鈔五錠吏典每名鈔二錠

孝宗弘治元年 幸學儀注先是吏部尚書王恕奏議釋

奠儀注禮部尚書周洪謨等具題奉 旨是尊先師當

以禮既成化初年有所舉只孔子前加幣用太牢改分

獻爲分奠其餘儀物俱照永樂年例行欽天監選擇弘

治元年三月初三日丁卯巳時吉是歲始用幣加太牢

續文獻通考 卷之三百一
武宗正德元年 幸學儀俱同成化

世宗嘉靖元年 幸學儀注

一欽天監選擇嘉靖元年三月初七日甲寅宜用辰時
吉前期致齋一日太常寺預脩祭儀祭帛設大成樂器
於殿上列樂舞生於階下之東西國子監灑掃殿堂內
外司設監同錦衣衛設 御幄於太成門之東上南向
司設監設 御座於彝倫堂正中鴻臚寺設經案於堂
內之左設講案於堂內西南至日置經於經案錦衣衛
設 鹵簿駕教坊司設大樂俱於 午門外是日早百
官免朝先詣國子監門外迎 駕分奠陪祀等官武官
都督以上文官三品以上及翰林院七品以上同國子

監官具祭服伺候行禮 駕從東長安門出鹵簿大樂
以次前導樂設而不作太常寺先陳設祭儀於各神位
前設帛設酒罇爵如常儀司設監設 上拜位於 先
師神位前正中學官率諸生於成賢街左迎 上至大
成門外降輦禮部官導 上入 御幄禮部官奏具服
上具皮弁服訖奏請行禮太常寺官導 上出 御
幄由中道詣大成殿陛下典儀唱執事官各司其事執
事官各斟酒於爵候導 上至拜位贊就位百官亦各
就拜位四配十哲分食官各列於陪祀官前俱北面立
贊迎神樂作樂止贊 止鞠躬拜興拜興平身通贊分
奠官陪祀官行禮同贊釋奠揖主 上揖主太常寺卿

跪進帛樂作 上立受帛獻畢授太常卿奠於神位前
樂止進爵樂作 上立受爵獻畢復授太常卿奠於神
位前樂止贊出圭 上出圭四配十哲兩廡分獻官以
次詣神位前奠爵訖各以次退就原位贊送神樂作樂
止贊 上鞠躬拜興拜興平身通贊分奠官陪祀官行
禮同贊禮畢太常寺官導 上由中道出 上入御幄
更翼善冠黃袍訖禮部官入奏請 幸彝倫堂 上升
輿禮部官鴻臚寺官前導由櫺星門出從太學門入諸
生先分列於堂下東西相向祭酒司業學官列於諸生
前 駕至祭酒以下及諸生跪伺 駕過然後起序立
北向百官分列堂外稍上左右侍立 上至彝倫堂升

御座贊祭酒司業學官諸生行五拜叩頭禮武官都督以上文官三品以上及翰林院學士升堂光祿寺預設連几於左右執事官各以次序立贊進講祭酒從東階升由東小門入至堂中鴻臚寺官舉經案進於御座稍前禮部尚書奏請授經於講官祭酒跪禮部尚書以經授祭酒祭酒受經置於講案訖復至堂中叩頭

上賜講官坐祭酒復叩頭就西南隅几榻坐講上賜武官都督以上文官三品以上及翰林院學士坐皆叩頭序坐諸生圍立於外以聽祭酒趙永講尚書大禹謨篇帝曰俞允若茲一章講畢以經置於案叩頭退出堂外就本位司業吳惠從西階升進講周易乾卦文言時

乘六龍一節如儀退就位鴻臚寺官奏傳 制內侍坐
官起立贊有 制祭酒以下學官及諸生俱北面詭聽
宣 諭曰聖人之道具在六經講明道體用資治化爾
師生其勉之宣畢贊五拜叩頭禮畢學官諸生以次退
先從東西小門出列於成賢街右伺候尚膳監進茶

御前 上命光祿寺 賜各官茶各官復坐飲茶畢退

列於堂外叩頭分班序立鴻臚寺奏禮畢 駕興升輿
出太學門升輦鹵簿大樂前導樂作祭酒以下及諸生
伺 駕至跪叩頭百官常服先詣 午門外伺候 駕
還鹵簿大樂止於 午門外 上御 奉天門鳴鞭百
官常服鴻臚寺致詞行慶賀禮畢鳴鞭 駕興還 官

百官退初八日 襲封衍聖公率三氏子孫國子監祭
酒率學官監生上表謝 恩 上具皮弁服 御奉天
殿錦衣衛設 鹵簿駕百官朝服侍班行禮畢 上易
服御奉天門禮部官引奏 賜祭酒司業學官及三氏
子孫衣服諸生鈔錠畢 駕還是日 上御奉天門
賜宴武官都督以上文官三品以上及翰林院學士并
檢討以上祭酒司業學官三氏子孫及禮部及太常光
祿鴻臚寺執事官員與宴初九日祭酒司業率學官監
生謝 恩 上賜 勅勉勵師生祭酒捧置彩輿師生
迎導至太學開讀行禮如儀初十日祭酒司業率學官
監生復謝 恩 一各衙門辦事監生俱各取回迎

駕觀禮 一 賜孔顏孟三氏子孫襲封衍聖公紵絲

衣一套犀帶一條紗帽一頂五經博士顏重德孟元各
紵絲衣一套帶一條紗帽一頂其餘族人各與素紵絲
衣一套 一講官每人照例各與紵絲衣一套羅衣一

套其餘學官每人與紵絲衣一套監生每名鈔五錠吏
典每名鈔二錠 是年續定 幸學儀注 聖駕將至

陪祀官武官自都督以上文官三品以上翰林院官七
品以上同國子監官具祭服伺候行禮 駕至櫺星門

外卽降輦步入 御幄易常服祭畢仍自 御幄步出

櫺星門外陞輦次日襲封衍聖公率三氏子孫國子監
祭酒率學官諸生上表謝 恩是日 賜三氏子孫衍

聖公等及祭酒司業宴於禮部 命本部尚書行禮餘
如成化間儀 十二年以 先師祀典既正再視學
命大臣一員致奠啓聖公祠先是 嘉靖十年十一月
十六日禮部尚書兼翰林院學士夏言等具題本月二
十四日奉 聖旨先師祀典既正 朕當躬謁於是欽
天監選擇三月十三日丙辰宜用寅時吉餘同元年儀
惟習禮公侯伯俱迎 駕聽講觀禮跪受宣 諭班列
於學官之次諸生之前是日祭酒林文俊講虞書益稷
篇 首明哉股肱良哉庶事康哉司業馬如驥講周易
頤卦孔子彖辭天地養萬物聖人養賢以及萬民頤之
時義大矣哉講畢退就本位祭酒以下學官及諸生俱

北面跪聽宣 諭曰 朕惟治平之道脩載六經爾諸
子宜力講求體行以資政化其勉之 十三年三月祀
太學釋奠先師進諸生橫經布講 諭以敦本務實勿
徒事詞章學官 賜帛有差

穆宗隆慶元年五月 命公侯伯應襲子弟俱赴國子監
習禮 八月癸未朔 上幸太學行釋奠於先師 命
輔臣徐階等分奠四配十哲兩廡啟聖祠 上御彝倫
堂 命武官都督以上文官三品以上及翰林院學士
坐 賜茶授祭酒司業經坐講 上宣 諭師生曰聖
人之道如日中天講究服膺用資治理爾師生其勉之
今上萬曆元年八月 上幸太學 命大學士陳以堯釋

奠於先師孔子 賜輔臣羊酒鈔錠有差 四年續定

視學儀注 駕至櫺星門外降輦禮部官吉服導

上入 御幄禮部奏請具服 上具皮弁服訖禮部官

奏請行禮 上出 御幄太常寺官導 上由大成門

中道入盥洗詣廟中與嘉靖元年儀稍異餘俱同前儀

次日方行慶賀禮襲封衍聖公率三氏子孫祭酒司業

率學官諸生各上表謝 恩先期設表案於 皇極殿

簷下裏王門外至日早錦衣衛設 鹵簿駕百官朝服

侍班 上具皮弁服 御中極殿禮部官及各執事官

行禮如常儀鴻臚寺官奏請 陞殿導 駕官前導樂

作 陸座樂止鳴鞭傳贊排班班齊鴻臚寺官致詞百

官行慶賀禮樂作五拜三叩頭訖樂止分班侍立序班
引衍聖公三氏等族人國子監師生過中替鞠躬樂作
四拜興平身樂止替進表樂作執事舉案由裏王門入
至簾前置定樂止替宣表自鴻臚寺堂上官一員隨禮
部堂上官捧表月過中內替替跪外亦替跪進表官俱
跪宣畢替俯伏樂作興平身傳替同樂止執事官舉案
過東邊替鞠躬樂作進表官俱四拜興平身樂止各入
本班立鴻臚寺官奏禮畢鳴鞭百官退出仍于 皇極
門朝服侍立 上易常服 御門鴻臚寺官傳奏事起
案執事官舉案置 御路中序班引襲封衍聖公等并
族人及國子監祭酒等官諸生上 御路替跪禮部官

奏請 頒賞承 旨訖贊叩頭衍聖公并祭酒等叩頭
起執事官舉案過東邊鴻臚寺官奏事畢鳴鞭 上興
還 官百官退是日免 賜宴後二日儀俱同前 又
查成化元年令取三氏子孫赴京觀禮 命衍聖公分
獻又查 嘉靖十二年題准衍聖公及顏孟之博士禮
部先期差行人前去行取及另取孔氏老成族人五人
顏孟族人各二人一同馳驛赴京迎 駕陪祀前期八
日 內閣及執事官赴國子監習儀至日習禮公侯伯
俱迎 駕聽講觀禮跪受宣 諭班列於學官之次諸
生之前三氏族入聽講序立文官之次各衙門辦事監
生俱取回迎 駕聽講觀禮

養老事例

太祖洪武元年令民年七十以上者許一丁侍養免其雜
泛差役 五年壬子夏五月 詔中外學宮行養老之
禮先是 太祖念海內晏安思化民俗以復其古遂
命禮部考儀禮及唐宋之制又采周官屬民讀法之旨
參定每歲孟春正月孟冬十月有司偕學官率士大夫
之老者行之于學宮其民間里社以百家爲一會糧長
或里長主之百人內以年最長者爲正賓餘以齒序坐
每季行之于里中大都皆本于正齒位之說而賓與賢
能春秋習射亦可通行焉酒舖不許奢靡若讀律令則
以刑部所編申明戒諭書兼讀之其武職衙門在內各

衛親軍指揮使司及指揮使司凡鎮守司每月朔日亦
以大都督府州編戒諭率僚佐讀之 制曰可遂 詔
應天府及直隸府州縣并各布政司府州縣俱舉行之
八年乙卯再頒示天下申飭之

十六年頒行鄉飲酒禮圖式 一各處府州縣每歲王
月望日十月朔日舉行于學宮除僎賓外衆賓戶齒及
坐其僚屬則序爵前一日執事者于明倫堂依圖陳設
坐次至日主及僚屬司正先詣學遣人速僎賓以下比
至執事者報賓至主偕僚屬迎於庠門之外以入主東
賓西三讓之揖而後升堂東西相向立贊兩拜畢皆坐
僎至僎至儀亦同既齊至各就位執事者引司正由西

階升詣堂中北面立執事者唱僎賓以下皆立各相揖
執事舉酒授司正司正曰恭惟 朝廷率由舊章敦崇
禮教舉行鄉飲非爲飲食凡我長幼各相勸勉爲臣盡
忠爲子盡孝長幼有序兄弟恭內睦宗族外和鄉里
無或廢墜以忝所生讀畢司正遂飲酒以觴授執事仍
各相揖司正復位及僎賓以下皆拱立行揖禮如揚觶
儀及讀皆肅而聽之有過之人俱赴正席立聽讀畢執
事者舉僎案至賓前次僎次价次主三賓以下次第舉
之乃主獻賓執事者斟酒以授主主受爵詣賓前置于
席稍退贊兩拜賓各拜以次奠爵儀如之畢主復位賓
遂酬主賓起僎從之執事者斟酒授賓賓授酒詣主前

置於席稍退兩拜賓僎主皆拜遂就位坐酒三行湯三品遂徹饌各起離席僎主僚屬居東賓僎三賓衆賓居西行兩拜禮遂送賓分東西行乃三揖出庠門而退一里社每歲春秋社祭會飲畢行鄉飲酒禮所用酒箴卽一百家內供辦坐以齒次年老者雖至貧上坐少者雖至富必下之不許挽越違者以違制論有過犯者雖年長而富亦坐席末聽讀律受戒論供飲酒畢同退如不行赴飲及強坐衆賓之上者爲頑民許主席及諸人首告遷邊遠爲民主席及衆賓容隱者同罪其各里社以百家爲一會內以里長主席其餘選年最高有德人所推服者一人爲賓其次一人爲僎餘以年齒叙坐如

有致仕者主席請以爲僕擇通文學者一人揚解一人
讀律一人贊禮前期主詣賓門請曰某日行鄉飲酒禮
吾子年高德邵敢請爲賓賓曰某固陋恐辱命敢辭主
曰詢諸衆莫若吾子賢敢固請賓曰夫子申命之某不
敢辭主遂拜賓答拜請价亦如之但改請吾子爲价先
執事者設賓席于堂中稍西南向設主席于堂東南西
向賓六十以上者席于堂中上兩序東西相向如賓多
年幼者席于堂下阼階之南北面西上至日主迎賓及
獻酬揚解讀律酒數行皆如學宮儀飲畢明日賓价僕
衆賓詣主家拜謝鄉飲之賜主出門拜謂辱昨日之來
一鄉飲之設所以尊高年尚有德興禮讓敢有誼譁

失禮者許楊鐔者以禮責之其或因而致爭競者至席
者會衆罪之 十九年夏四月 詔曰昔元末播蕩海
內擾兵所在黔黎苦殃甚矣如此者一紀有奇朕 命
前征虜大將軍中山武寧王及公侯群將發兵諸道所
向克敵民得粗安統一天下曰 大明今十有九年然
奸臣在位謀間臣民恩施本施而弗及德將布而沮行政
乖理悖莫甚於此獨去歲 大誥頒行民從朕 命至
奸擾吾民者循法而歛迹進士監主職任諸司想吾民
樂生有漸矣今特 命有司存問高年優恤無告鰥寡
孤獨廢篤殘疾者收入孤老歲給所用使得天年所有
合行事理條列于後凡民八十九十而鄉黨稱善者有

司以時存問若貧無產業年八十以上者月給米五斗
肉五斤酒米三斗九十以上歲加帛一疋絮一斤其有
田產能贍者止給歲酒肉絮帛惟應天鳳陽二府富民
年八十以上 賜爵里士九十以上 賜爵社士與縣
官平禮復其家冠帶服色別議頒行其鰥寡孤獨不能
自給者悉蠲其差徭 二十年閏六月 命試禮部尚
書李原名申諭有司行養老之政先是 太祖召原名
諭之曰尚齒所以敬事長所以教順虞夏商周之
世莫不以齒爲尚而養老之禮未嘗廢是以人興於孝
弟風俗淳厚治道隆平曩者朕 詔天下 大明會典載
十九年令也
行養老之政凡耆民年八十九十鄉黨稱善者有司以

時存問若貧無產業年八十以上者月給米五斗酒米三斗肉五斤九十以上歲加帛一匹綿一斤其有田產能自贍者止給酒肉絮帛其應天鳳陽二府富民九十以上賜爵社士八十以上 賜爵里士咸冠帶復其家尚虞有司奉行不至爾其以 朕命申之

會典云里士社士與縣

官平禮

二十二年定鄉飲酒禮凡良民中年高有德無

公私過犯者自爲一席坐於上等有因戶役差稅遲悞及曾犯公杖私笞招犯在官者又爲一席序坐中門之外其曾奸盜詐僞說事過錢起城詞訟蠹政害民排陷官長及一應私杖徒流重罪者又爲一席序坐於東門之外執壺供事各用本等三家子弟各要分別三等

坐次善惡不許混淆其所行儀注並依原頒定式如有不遵圖序坐及有過之人不行赴飲者以違制論

按圖席主對大賓主位于東南大賓位于東北介對僎介位于西南僎賓位于西北是四正也三僎自大賓以次而東三賓自僎賓以次而西司主從主而位于東南以教官爲之主楊解僚屬居東衆賓居西恭閱太祖此制不獨行于官而又令各行于里社不怒而勸懲攸屬不言而情文交洽審若此不啻唐虞三代之風矣惜乎爲有司者視爲故事未聞有着實行之者而况可責之里社之小民乎

建文帝元年 詔軍民男婦有八十九十者 賜米一石

肉十斤酒三斗九十者加 賜帛一疋綿一斤若身犯杖以上隸卒倡優不與所在鰥寡孤獨無產不能自存者有司歲給米三石令親戚收養無親戚隣里養之毋令失所

成祖永樂辛丑 詔民年八十以上有司給絹二疋布二疋酒一斗肉十斤時加存恤 明年甲寅令民年七十以上及篤廢殘疾者許一丁侍養不能自存者有司賑給八十以上者仍給絹二疋綿二斤酒一斗時加存問 英宗天順八年 詔凡民年七十以上免一丁差役有司歲給酒十瓶肉十斤八十以上者加綿二斤布二疋九十以上者給冠帶每歲待一次百歲以上者給板木

世宗嘉靖中祭酒呂柟定 視學養老儀注惜不果行

按柟據開元禮圖參定養老禮儀 歲季春之月擇吉

日行養老禮於太學有司先奏定三師三少致仕者用
德行年高一人爲三老次一人爲五更三品上下年德
高邵者爲群老併開具致政之老與其孤姓名事狀以
聞前期三日設 御幄於太學堂後設 御座於太學

堂正中南向莞筵粉純加藻席畫純次席黼純設三老
座於西楹近北東向設五更座次三老東向皆莞筵粉
純加藻席畫純設群老位於西階上東向皆蒲筵緇布
純加莞席玄帛純几席皆不相屬設致政之老與其孤
館幕於門外太常卿展宮懸列癭綴於庭設升歌於堂

上及舉麾位等一如元會之儀有司設罇於東楹之西北向左玄酒有坩以置爵前期一日有司具牲帛祭器祭先師孔子 上遣官行禮齋宿省牲陳設奠獻一如丁祭之儀惟祝文曰維某年月日朔甲子 皇帝謹遣某致祭於先師孔子是月某日養三老五更群老於太學用幣敬伸奠告以顏子曾子子思子孟子配尚享昧爽卒事復 命又設先老位於廟門之前陳設如儀至日黎明鼓徵鼙衆設生侑舞生皆至 駕乃出宮太學官率諸生迎 駕于太學路左 駕至太學官及諸俯伏稽首興傳 制迎三老五更于其第三老五更俱朝服乘安車導從如常儀擇史官充傳史二人朝服從之

其群老及致政之老與其孤則有司先戒之宿於太學以俟 駕至太學堂 上 命官釋奠於先老禮畢太常卿導 上入 御幄易冠服出陞 御座執大圭協律郎跪俯伏舉麾金奏姑洗之均樂止太常少卿導三老五更皆杖各二人夾扶左右惇史執筆以從自西階升堂 上興揖進欲拜三老五更去杖攝齋皆稽首遜辭 上不果拜乃揖就座三老五更皆坐三老授几九卿正履進珍饈及黍稷等 上省之遂設于三老五更前工升歌鹿鳴三終太常卿引 上詣三老座前以大珪授侍臣執醬而饋訖有司以次進珍饈酒食于五更前又設酒食于群老前太常卿引 上詣酒罇所取爵

替酌酒訖太常卿引 上詣三老座前執爵而酌訖

上卽座三老以下皆坐光祿卿進酒 上飲酒三老以

下坐食飲酒各三爵笙入三終光祿卿進加饔羹飲酒

各三爵間歌三終三老乃論父子君臣長幼之道治政

之要五更飲亦如之 上俱虛躬聽受惇史執筆錄之

乃大合六樂羽舞大韶以雲門咸池合之干舞大武以

大夏大濩合之 上興冕而總干三老以下皆興稽首

遜辭 上復卽座三老以下皆復坐飲酒各三爵樂九

變畢太常卿跪奏樂闋致政之老與其孤館於門外者

飲酒食畢皆入侍 制命有司曰養爾老幼毋違 朕

命三老以下趣出 賜三老五更襲衣冠帶牢醴菜幣

其餘帛衣米肉三老以下序立于庭皆拜三稽首興分
班序立有司奏禮畢 上興出就 駕還 宮明日三
老率五更以下詣 闕謝表

尊年 恩例

高皇帝 詔諸耆老謁見而峴山周壽誼居首年一百十
六歲 賜宴及鈔幣 天順中召京師人百四歲茹大
中入見便殿 賜宴順天府 賜冠帶襲衣 命禮部
尚書姚夔造其第賀之 成化中濟寧人王自能以百
十六歲徵又七年終又 韓王奏群牧所千戶朱政曾
祖信年一百六歲而終祖全一百二歲父鏞八十二歲
見存三代皆以千戶致仕 詔信全俱進階宣武將軍

各賜羊酒白米二石 弘治中太倉州毛弼年百歲而孫澄狀元及第有司爲建人瑞狀元坊 福建林知府春澤百歲時有司爲蓋百歲坊而子侍卽應亮年七十三孫學憲如楚乞歸侍又四年而春澤始卒

三氏學

魏黃初中於闕里建三氏學專教孔顏孟三氏子孫也唐以來興廢不一 宋乾興元年孫興公守兗因廟建學請以楊光輔爲講書轉奉禮卽元祐四年尹復奏以文潞公薦爲敎授而學正學錄分任其事前代皆孔子後爲之蓋當時敎授自置也 元世祖中統初立曲阜廟學遴選師儒充孔顏孟三代子孫敎授正錄各一員訓

其子弟比之常例優加擢用時大司農姚樞請以儒人
楊庸教授其三氏子孫入國學者俾同朝官子列任教
官者比常例每減一考入流學舊有田三千畝占于豪
民至順中孔思晦理而復之

皇明宣德中 詔三氏教授所學錄保任孔氏一人五十
五代克晏爲之後五十七代論五十五代克晏五十五
代克照五十八代公璜五十八代公杰五十八代公鉉
五十九代彥衢五十九代彥佩六十六代承高六十六代承
祚相繼代任

天順中給三氏教授印開生員歲格蠲孔氏田租

景泰弘治嘉靖隆慶四 幸學衍聖公率三氏子孫觀禮

公 賜大紅織金仙鶴羅紗帽金縷犀束帶三氏 賜
冠帶有差 又以衍聖公次子一人爲子思後得世襲
五經博士而嫡系在衢州者亦得世襲五經博士還其
西安祭田五頃在河南者世襲國子學正又推保族之
賢者一人世爲曲阜知縣又給復其家人五百名

宗人授官附

永樂中宗人孔諤以會試副榜第一人見 皇太子特授
左春坊中允後改御史 天順中宗人公恂自禮科給
事中超拜爲詹事府少詹事

續文獻通考卷之五十九終

續文獻通考卷之五十九

續文獻通考卷之六十

皇明進士雲間王圻纂輯

學校考 郡國鄉黨學

字學醫學
蒙古學附

宋

寧宗嘉定中趙彥啟監青龍鎮稅務重建鎮學以養士百里之間絃誦相聞 是時趙崇本知崇安興學校捐俸請買開平廢寺田以充學廩又請佃西林興福二寺廢租以折納餘羨助養士之費

理宗景定初王鏜任江寧知縣縣舊無學鏜下車慨然以興學爲任時值諸學置官鏜曰有師無學非所以稱上旨即建學於縣廨之北又置田若干畝以備學之廩粟

嘉熙元年趙汝鏜知桐廬縣發縣帑五千緡增置學田養士 淳祐元年王泌知睦州修州學行鄉飲新釣臺書院次第脩舉

遼聖宗統和元年十二月歸州言其居民本新羅所遷未習文字請設學以教許之

道宗清寧元年十二月詔郡縣設學養士頒五經傳疏置博士助教各一員 咸雍時太公鼎爲良鄉令省徭役務農桑建孔子廟學部民服其化 太康時耶律孟簡爲高州觀察使修學校招生徒以循吏著

金

太宗時赤盞暉爲歸德軍節度使時宋州舊無學暉爲營

建學舍勸督生徒肄業者復其身人競趨之

世宗大定十六年四月詔京府設學養士凡十七處共千人初以嘗與廷試及宗室皇家袒免以上親并得解舉人爲之後增州學遂加以五品以上官曾任隨朝六品官之兄弟子孫餘官之兄弟子孫曾經府薦者同境內舉人試補三之一經府薦及終場免試者不得過二十人凡試補州府學生以提舉學校學官主之曾得府薦及終場舉人皆免試凡經史註疏會課學規一同太學之制 二十九年章宗已即位上封事者乞興學校推行三舍法及鄉以八行貢春官以設制舉宏詞事下尚書省集百官議戶部尚書鄧儼等謂三舍之法起于宋熙寧

間王安石罷詩賦專尚經術太學生補外舍無定員由外陞內舍限二百人由內陞上舍限百人各治一經每月考試或特免解或保舉補官其法雖行而多藉勢力尚趨走之弊故蘇軾有三舍既興貨賂公行之語是以元祐間罷之後雖復而宣和三年竟廢臣等謂立法貴乎可久彼三舍之法委之學官選試啟僥倖之門不可爲法唐文皇養士至八千人亡宋兩學五千人今策論詞賦經義三科取士而太學所養止百六十人外京府或止十人天下僅及千人今若每州設學專除敎授月加考試每舉所取數多者賞其學官月試定爲三等籍之一歲中頻在上等者優復之不率敎行惡者黜之廢

幾得入之道也上從其議遂計州府戶口增養士之數
于大定舊制京府十七處千人之外置節鎮防禦刺史
州學六十處增養千人各設教授一員選五舉終場或
進士年五十以上者爲之府學二十有四學生九百五
人大興開封平陽真定東平府各六十人太原益都府
各五十人大定河間濟南大名京兆府各四十人遼
陽彰德府各三十人河中慶陽臨洮河南府各二十五
人鳳翔平涼延安咸平廣寧興中府各二十人
節鎮學三十九共六百一十五人絳定衛懷滄州各三
十人萊密潞汾冀邢
充州各二十五人代同邠州各二十人防禦州學二十
奉聖州十五人餘二十三節鎮皆十人防禦州學二十
一共二百三十五人傳德名棣臺各十五
人餘十六州各十人以上共千八
百人其長貳幕職內各以進士官提控其事仍具入銜
泰和元年九月更定贍學養士法郡縣生員給民佃

官田六十畝歲支粟三十石 承安四年八月詔諸路學校生徒少者罷教官止以本州府文資官提控

宣宗興定元年二月尚書省以軍儲不足請罷州府學生廩給上曰自古文武並用向在中都設學養士猶未嘗廢況今日乎其令仍舊給之 時任天寵爲威戎縣令縣故堡寨無文廟學舍天寵以廢署建之

女直學 金世宗大定四年以女直大小字譯尚書頒行之後擇猛安謀克內良家子弟爲諸生諸路至三千人九年取其尤俊秀者百人至京師以編修官溫迪罕締達教之 十三年以策論取士始于諸路設汝直府州縣二十二中都上京胡里改恤頻合懶蒲與婆速咸

平泰州臨潢北京冀州開州澧州西京東京益州隆州
東平益都河南陝西凡取府學生之制皆與詞賦經義
生同又定制每謀克取二人若宗室每二十戶內無願
學者則取有物力家子弟年十三以上二十以下者充
凡會課三日作策論一道季月私試如漢生制二十
九年勅以女直進士提控其事具入官衙河南陝西女
直學序安二
年罷餘
如舊

元

世祖中統二年始命置諸路學校官凡諸生進修者嚴加
訓誨務使成材以脩選用 三年嚴忠範奏請補東平
路廟學從之 至元初王遵爲彰德路總管重修廟學

訓飭生徒褒勸勲怠賢才革興 十三年賽典赤爲雲
南行省平章雲南俗無禮義男女往往自相配偶親死
則火之不爲喪祭子弟不知讀書賽典赤教以拜跪之
節婚姻行媒死者爲棺槨奠祭教民播種爲陂池以蓄
水濟旱創建孔子廟明倫堂購經史授學田由是文風
稍興 十五年張立道除忠慶路總管先是雲南未知
尊孔子祀王逸少爲先師立道首建孔子廟置學舍勸
士人子弟以學擇蜀士之賢者迎以爲子弟師歲時率
諸生行釋菜禮人習禮讓風俗稍變矣 十九年命雲
南諸路皆建學以祀先聖 二十三年閏二月設江南
各道儒學提舉司帝御德興府行宮詔江南學校舊有

學田復給之以養士初浙江行省理筭錢穀甚急乃所
在學田輸其直于官利用監臣撤里見之謂曰學有田
以供祭祀育賢才安可鬻耶遂奏罷之 是年大司農
上諸路學校凡二萬一百六十所 二十五年十月尚
書省臣奏令集賢院諸司分道鈎考江南郡縣學田所
入羨餘貯之集賢院以給多材藝者從之 二十六年
九月置高麗國儒學提舉司 二十八年令江南諸路
學及各縣學內設立小學選老成之士教之其他先儒
過化之地名賢經行之所與好事之家出錢粟贍學者
並立爲書院凡師儒之命于朝廷者曰教授路府上中
州置之命于禮部及行省與宣慰司者曰學正山長學

錄教諭州縣及書院置之路設教授學正學錄各一員
散府中上州設教授一員下州設學正一員縣設教諭
一員書院設山長一員中原州學山長學錄教諭並授
禮部劄付凡各府所屬州縣學正山長學錄教諭並授
行省及宣慰司劄付凡路州府書院設直學以掌錢穀
從郡守及憲府官試補直學考滿又試所業十篇陞爲
學錄教諭凡正長論錄教授或由集賢院及臺憲等官
舉充之諭錄歷兩考陞正長正長一考陞散府上中州
教授上中州教授又歷一考陞路教授教授之上各省
設提舉二員正提舉從五品副提舉從七品提舉凡學
校之事後改直學考滿爲州吏例以下第舉人充正長

脩榜舉人充諭錄有薦舉者亦參用之自京學及州縣學以及書院凡生徒之肄業于是者守令舉薦之臺憲考覈之或用爲教官或取爲吏屬徃往人材輩出是年司業司上諸路所設學校凡二萬一千三百餘陶安曰先王仁愛斯民其政尤要者三治有封建養有井田教有學校三代迹熄首變治養之制惟學校久而益廣漢晉以下學盛于京師而郡縣無定設唐宋以來學布于郡縣而教官無常銓縣倚郭者皆弗克特建附隸郡庠而已今邑必置學學必置官祿雖輕而道則尊勢雖孤而事則專是以儒者試仕願階乎此

二十九年詔江南州縣學田其歲入聽其自掌春秋釋

奠外以廩給師生及士之無告者貢士莊田則令覈數
入官 至正間蒲理翰知鄭州下車首事廟學範銅爲
祭器製革帛爲禮服 至元間司仁知輝州增飭學舍
敦理師儒選秀民充弟子員復設鄉學以教之 是時
段直以功授澤州長官招撫逃民澤爲樂上大修孔子
廟置書萬卷迎儒士李俊民爲師以延四方來學者不
五六年學之士子以通經被選者百二十有二人朝廷
特命提舉本州學校事 時陳佑爲衛輝路總管創立
孔子廟

成宗大德元年五月詔各省止存儒學提舉司一餘悉罷
之 時李仲彬爲武安尹擇師教子弟必以孝弟忠信

爲本春秋修行釋菜禮以易風俗爲已任

仁宗延祐二年楊景行以進士授贑州路會昌州判官創學舍禮師儒勸民出腴田以膳士弦誦之聲遂盛

時史堦爲常州路總教興放勸學卽郡庠建尊經閣以儲書籍俾學者得以觀覽 皇慶元年敬儼爲浙江道廉訪使取憲司廢堂材木及諸路學廩之羨者建孔子廟民無勞費 三年五月置甘肅諸路儒學提舉司

英宗至治間趙鳳儀爲台溫路總管諭民喪祭婚嫁以禮
勸廟學延明師以淑後進

泰定帝五年王由義爲彰德路總管割俸修學 時白景

亮爲衢州路總管郡學之政久廢從祀諸賢無塑像諸

生無廩給祭服樂器有缺景亮皆爲備之儒風大振縉紳稱頌焉

順帝元統二年二月詔內外各舉學校 是時月魯不花爲台州錄事司達魯花赤縣未有學乃首建孔子廟旣又延儒士爲師以教後進 至元元年十月勅以所在儒學貢士庄田租給宿衛衣糧時宋文懿爲烏程縣丞首建學校以崇文教 至正七年韓鑄爲饒州路總管選民俊秀入學求者宿有學行者爲五經師朔望幅巾深衣以謁先聖每月考課以示勸勉 時文殊海涯監尤溪縣興學政增置弟子員及鄉社俱令立學擇師儒以主教事 時又有李起巖爲淦主簿勸民興學諭以

孝弟廉耻 時又有蘇宗端尹上海爲文廟置禮器几
籩豆罍爵琴瑟鐘鼓之屬莫不備具 時又有王至和
知松江府考訂釋奠禮製執事者冠制 時又有夏思
忠爲杭州路總管杭學兵火之後前守帖木烈思興造
甫畢後被火燼思忠以興復爲已任因烈思舊緒盡購
禮拜寺地以廣學基廟宇嚴整杭學遂爲浙右冠

字學 世祖至元六年置諸路蒙古字學中書省定學制
頒行之命諸路府官子弟入學上路二人下路二人府
一人州一人餘民間子弟上路三十人下路二十五人
願充生徒者許免一身雜役以譯寫通鑑節要頒行各
路俾肄習之至 成宗大德十年又定生員散府二十

人上中州十五人下州十人 元貞元年命有司割地
給諸蒙古學生員餼廩其學官 至元十九年定擬路
府州設教授以國子在諸學之上 大德四年添設字
學生員上自國學下及州縣舉生員高等者從翰林院
考試凡學官譯史取以充焉

醫學 世祖中統二年太醫院使王猷言醫學久廢後世
無所師授學非其傳爲害甚大乃遣副使王安仁授以
金牌往諸路設立醫學其生員擬免本身差撥等役俟
其學有所成每月試以疑難視其所對優劣量加勸懲
後又定醫學之制設提舉綱維之凡隨朝太醫及醫官
子弟與路府州縣學官並須試驗其久負名者會所述醫

經文字悉從考核其諸藥所產性味真偽悉從辨驗其
隨路學校每歲出降十三科疑難題目具呈太醫院發
下諸路醫學令生員依式習課醫業年終製簿解納送
本司以定其優劣 二十八年廉訪副使陳詳建明州
府醫學

王應麟記畧曰醫不可無學岐伯之師曰跖俠李秦越
人之師曰長桑君倉公之師曰公孫光陽慶然學孰爲
要一言蔽之曰仁程子謂醫書以痿痺爲不仁最善明
狀仁者又曰切脉可觀仁仁人心也天地生生之心人
得之以爲心心仁則疾病切身若保赤子萬物一體也
不仁則善不勝利理泊於欲肝膽楚越也以仁存心以

心合天如涪翁之不求報宋清之不爲市寵安常之好
施許叔微之陰功精義入神將得不傳之妙于筌蹄之
表其或專已意逆乃曰醫者意也是猶昧學古入官之
訓而曰何必讀書其害不止誤註本草而已

武宗至大五年七月

即位

禁醫人非選試及著籍者毋

行醫學

陰陽學 世祖至元十六年始置諸路陰陽學詔江南若
有通曉陰陽之人各路官司詳加取勘依儒學醫學之
例每路設教授以訓誨之其有術數精通者每歲錄呈
省府赴都試驗果有異能則于司天臺內許令近侍
延祐初令陰陽人依儒醫例於路府州設教授一員凡

陰陽人皆管轄之而上属于太史焉

皇明

郡國學校

國初兩京及中都俱設國子監天下府州縣俱設儒學其後裁中都國子監而各都司衛所亦設學

太祖洪武二年十月辛卯 詔郡縣立學校曰古昔帝王育人材正風俗莫先于學校自元入主中國夷狄腥羶汚染華夏學校廢弛人紀蕩然加以兵亂以來人習爭鬪鮮知禮義今朕統一天下復我中國先王之治宜大華風以興治道今雖內設國子監恐不足以盡延天下之俊其令天下郡縣並建學校以作養士類師生月廩

食米人六斗有司給魚學官月俸有差學者專治一經
以禮樂射御書數設科分教務求實材頑不率者黜之
八年立社學是年 命御史臺選國子生分教北方
建文中罷北平山東河南山西陝西五省及江北學校
貢士靖難後復故

選補生員事例

洪武初令在京府學生員六十人在外府學四十人州學
三十人縣學二十人日給廩膳聽于民間選補仍免其
家差徭二丁 二十年令增廣生員不拘額數 二十
五年奏准起取富民原係生員者送應天府學讀書
永樂三年令起取人匠內有生員照例送應天府學

宣德三年定增廣生員在京府學六十人在外府學四十人州學三十人縣學二十人照例優免差徭 正統元年令生員名缺許本處官員軍民之家及社學俊秀無過犯子弟選補 十二年奏准生員常額之外軍民子弟願入學者提調教官考選俊秀待補增廣名缺一體考送應試 天順六年令廩膳有缺于增廣內考選學問優等者幫補 弘治七年奏准廩膳有缺不許將別學增廣調補 正德十年奏准都司衛所學原定一年一貢者與設優等次等生員各四十名原定三年二年一貢者與設優等次等生員各三十名原定二年一貢者與設優等次等生員各二十名通行提學官考補以後

於優等內照例考選充貢有多餘者俱作附學不堪者不必取足 嘉靖二年令增順天府廩膳生員二十名三年令增應天府學廩膳增廣生員順天府學增廣生員各二十名 十一年奏准承天府學廩膳增廣生員六十名其鍾祥縣學生員亦照例通隸府學 十五年詔各處學校廩膳生員有親老無人侍養願告侍親者聽親終復學其累科不第年五十以上願告退閒者給與冠帶榮身仍免本身雜泛差徭凡衛學 成化三年令衛學四衛以上軍生八十人三衛以上軍生六十人二衛一衛軍生四十人不及者不拘有司儒學軍生二十人 嘉靖二十一年題准直隸金山衛學照福建

平海衛學例添設廩膳二十名應給廩米華亭上海二縣出辦 又題准貴州普定等十三衛各設廩膳生員二十名各該衙門通融處給廩米 隆慶二年題准直隸各衛儒學原屬衛官提調者仍以本衛官提調惟季考生員及考選童生聽各該巡按御史定委通判等項文職官管理

凡軍舍入學洪武二十七年令武官舍餘年十五以下許入府州縣學讀書 宣德七年令衛所官舍軍餘俊秀者許入附近府州縣學聽本處鄉試 景泰二年令雲南貴州軍民生相兼考補廩膳照例科貢 三年令各處軍生許考補廩膳照例科貢

凡土官入學成化十七年令土官嫡子許入附近儒學
正德十六年奏准歸順土官子孫但經一次送順天府
學食廩者不論事故及中式俱不許再補 嘉靖二十
六年題准歸順土官子孫照舊例送學食廩讀書 萬
曆四年題准廣西雲南四川等處凡改土爲流州縣及
土官地方建有學校者令提學官嚴加查試果係土著
之人方准考充附學不許各處士民冒籍濫入

學規

太祖洪武二年 詔天下府州縣立學校學者專治一經
以禮樂射御書數設科分教 三年定學校射儀前期
戒射定耦選職事充司正副司正司射司射器請射畢

爵收矢執旗樹鵠陳設訖至日執事者入就位請射者
引主射正官及各官員子弟士民俊秀者各就位司射
器者以弓矢置於各正官及司射前請射者詣正官前
圓揖畢引詣司射器前受弓矢訖復位司正執筭入立
於中後請射者詣弓射前曰請誘射引司射二人耦進
各以三矢播于腰帶之右以一矢挾于二指間推年齒
相讓年長者爲上射年幼者爲下射上射先詣射位向
鵠正立發矢司正書中投筭置于中舉旗者如所射應
之射畢退立于傍讓下射者詣位射訖請射者俱引復
位收矢者收矢復于射者司正取所中筭請射者次請
士民俊秀射次請官員子弟射次請品卑至品高者射

其就射位發矢筭書中舉旗收矢復位皆如前儀既畢
司正副司正各持筭白中于主射正官舉爵者酌酒授
中者飲之中的者三爵中采者二爵飲訖請射者請屬
官以下仍捧弓矢納于司射器還詣主射正官前相揖
而退 六年令今後一應文字只用散文不許爲四六
誤後學 十五年頒禁例于天下學校鐫勤卧碑置于
明倫堂之左永爲遵守 一今後府州縣生員若有大
事干於已家者許父兄弟姪具狀入官辯訴若非大事
含情忍性毋輕至于公門 一生員之家父母賢智者
少愚癡者多其父母賢智者子自外入必有家教之方
子當受而無違斯孝行矣何愁不賢者哉其父母愚癡

者作爲多非子旣讀書得聖賢知覺雖不精通實爲癡
父母之幸獨生是子若父母欲行非爲子自外入或就
內知則當再三懇告雖父母不從致身將及死地必欲
告之使不陷父母於危亡斯孝行矣 一軍民一切利
病並不許生員建言果有一切軍民利病之事許當該
有司在野賢人有志壯士質朴農夫商賈技藝皆可言
之諸人毋得阻當惟生員不許 一生員內有學優才
瞻深明治體果治何經精通透徹年及三十願出仕者
許敷陳王道講論治化述作文詞呈稟本學教官考其
所作果通性理連僉其名具呈提調正官然後親齎赴
京奏聞再行面試如果真才實學不待選舉即行錄用

一爲學之道自當尊敬先生凡有疑問及聽講說須誠心聽受若先生講解未明亦當從容再問毋恃已長妄行辯難或置之不問有如此者終世不成 一爲師長者當體先賢之道竭忠教訓以導愚蒙勤考其課撫善懲惡毋致懈惰 一提調正官務在常加考較其有敦厚勤敏撫以進學懈 不律 頑狡許以罪斥去使在學者皆爲良善斯爲稱職矣 一在野賢人君子果能練達治體敷陳王道有關政治得失軍民利害者許赴所在有司告給文引親齎赴京 面奏如果可采即便施行不許坐家實封入遞 二十四年令各處儒學每遇朔望有司官至日早詣學謁廟行香師生出大門

外迎接行禮畢請至明倫堂師生作揖教官侍坐生員
東西序立講書提調官考課畢退師生復送至大門外
回學其別廟行香師生不必隨行如春秋祭祀迎接

詔旨師生仍依定例 又今生員熟讀 大誥律令歲

貢時出題試之民間習讀 大誥子弟亦令讀律 又

令教官人等務要依先聖先賢格言教誨後進使之成
材以脩任用敢有妄生異議瞽惑後生乖其良心者誅
其本身全家遷發化外 二十五年定禮射書數之法

一朝廷頒行經史律誥禮儀等書生員務要熟讀精
通以備科貢考試 一遇朔望習射于射圃樹鵠置射
位初三十步加至九十步每耦二人各挾四矢以次相

繼長官主射射畢中的飲三爵中采二爵 一習書依
名人法帖日五百字 一數務在精通九章之法

成祖永樂三年申明師生每日清晨陞堂行恭揖禮畢方
退晚亦如之生員會食肄業毋得出外游蕩

英宗正統六年令提調官置簿列生員姓名又立爲籤公
暇揭取稽其所業提學官所至察提調勤怠以書其稱
否其生員有奸詐頑僻藐視師長齟齬教法者悉黜退
爲民

憲宗成化三年令提學官躬歷各學督率教官化導諸生
仍置簿考驗其德行優文藝贍治事長者列上等簿或
有德行而劣于經義或有經義而短于治事者列二等

簿經義雖優治事雖長而德行或缺者列三等簿歲課
月考循序而上非上等不許科貢

孝宗弘治十六年題准生員不拘廩增附學敢有傲慢師
長挾制官府敗倫傷化結黨害人者本學教官具呈該
管官員查究得實依律問罪合充吏者發本布政司衙
門充吏役滿爲民當差

世宗嘉靖十年題准生員內有刁潑無耻之徒號稱學霸
恣意非爲及被提學官考校或訪察黜退妄行訛毀赴
京奏擾者奏詞立案不行仍行巡按御史拏問 十六
年今士子文字敢有肆爲怪誕不遵舊式者提學官即
行革退

廩饌

太祖洪武初令師生廩食月米六斗後復令日米一升魚肉鹽醢之類皆官給之 十五年令廩饌月米一石

英宗正統元年令師生日逐會饌有司僉與膳夫府學四名州學三名縣學二名

孝宗弘治三年奏准膳夫每名歲出柴薪銀四兩以備會饌之用 八年令膳夫每名歲出柴薪銀十兩若師生不行會饌有司失于供應聽提學官究治

世宗嘉靖十九年題准孔顏孟三氏教授司生員廩米充州府通融處給

穆宗隆慶六年議准劄行順天府將交趾歸順土官膳夫

照例編給不許額外增編

考試事例

太祖洪武二十七年令生員入學十年之上學無成效送部充吏其有成效及十年以下照依入學年月編次造冊解部以備取用其科舉歲貢亦照編次起送 又令廩膳十年之上學無成效增廣年二十之上不通義理者皆充吏其托故偽訟革罷不應選者照卷追徵食過廩膳還官米數實收開繳戶部知數本生送吏部充吏 二十九年令凡罷閒等項生員食糧年深以偽訟愚鈍等事革退者假父殘疾告回侍親者以富戶技藝戶倉脚夫起取戶丁因而在京潛住者侍親親終及病痊

制終不行入學者因愚鈍患病侍親等事經斷罷閒後
以人材等項舉保爲官者皆充吏不追糧凡在學讀書
及在家丁憂病故者因父伯叔任軍官別無親男坐名
起取襲職者告單丁重役及父母年老侍親者因父爲
事代父起解間發充軍者父兄叔姪當軍戶內無丁告
退者爲手足殘疾耳目盲聾告退者爲事充軍工役及
以愚鈍犯法等故黜罷後爲事充軍工役者爲本支親
屬極刑黜退者戶內軍故勘合坐名勾補者皆免充吏
不追糧

成祖永樂二年令增廣生員入學十年若年二十之上魯
鈍不能行文者充吏

宣宗宣德三年奏准巡按御史會布按二司并提調教官
考試生員廩膳十年之上學無成效者發附近布政司
直隸發附近府州充吏六年以下鄙猥無學者追還廩
米爲民

英宗正統元年令廩膳六年以上不諳文理者充吏增廣
六年以上不諳文理者爲民 四年令生員以疾病罷
黜者免追廩米有犯誣誤聽贖罪還學若犯奸盜詐僞
挾制官府毆罵師長教唆詞訟說事過錢包占人財物
田土等項廩膳追糧解京增廣附近軍民衙門俱贖罪
充吏其犯受賄奸盜不分廩增照例運輒運炭納米擺
站等項滿日發回原籍爲民 十年奏准提學官會布

政司堂上官一員兩直隸會巡按御史公同提調教官
考選生員年四十以上不諳文理者廩膳十年以上送
吏部六年以上送附近布政司增廣十年以上送本布
政司兩直隸送本府俱充吏六年以上并鄙猥殘疾者
悉黜爲民雲南貴州免考 十四年令生員有犯該發
充吏者廩膳免追糧米若犯受賊奸盜月積宿娼居喪
娶妻妾事理重者兩直隸發充國子監膳夫各布政司
充隣近儒學膳夫齋夫滿日原籍爲民廩膳仍追糧米
英宗天順五年令各處會官考選廩膳未及六年考不中
者追廩爲民六年令生員爭貢及越前者俱充吏是年
定 勅諭以後奉以從事

憲宗成化九年奏准直隸考退生員免追廩米

風憲官提督

英宗正統元年奏准各處添設按察司副使或僉事一員
南北直隸監察御史各一員請 勅專一提督學校
十年令提學官遍請所屬學校嚴加考試提督生徒學
業務見實效有不職者禮部都察院堂上官詢察具奏
罷黜

景皇帝景泰元年革罷提學風憲官聽巡按御史各司府
州縣官提督考察 又令按察司分巡各道副使僉事
照依提學官先奉 勅書事理提督兩直隸御史提督
英宗天順六年復設各處提督學校官各 賜勅諭 一

學者讀書貴乎知而能行先將聖賢經書熟讀背誦牢記不忘却從師友講解明白俾將聖賢言語體而行之敦尚孝弟忠信禮義廉耻之行不許徒務口耳之學將來朝廷庶得真才任用一爲學工夫必收其放心主敬窮理毋得鹵莽間斷其於修己治人之方義利公私之辨須要體認精切庶幾趨向不差他日出仕方能顧惜名節事業可觀一習學舉業亦窮理之事果能精通四書本經便會行文有等生徒不肯實下工夫惟誦舊文意圖僥倖出身今宜痛革此弊其所作四書經義策論等文務要典實平順說理詳明不許浮誇怪誕至於習字亦須端楷庶不乖教養之意一學效無成

皆由師道不立今之教官賢否不齊先須察其德行考其文學果所行所學皆善須禮待之若一次考驗學問踈淺及怠于訓誨者姑戒勵之令其進學改過若再考無進不改送吏部別用其貪淫不肖實跡彰聞者不必考其文學即送按察司直隸送巡按御史問理吏部別選有學行者補其缺 一師生每日坐齋讀書及日逐會饌有司僉與齋夫膳夫府學膳夫四名齋夫八名州學膳夫三名齋夫六名縣學膳夫二名齋夫四名不許違悞缺役 一生員考試不諳文理者廩膳十年以上發附近去處充吏六年以上發本處充吏增廣十年以上發本處充吏六年以上罷黜爲民未及六年者量加

決罰勉勵進學 一生員之家並依洪武年間例除本身外戶內優免二丁差役有司務要遵行不許故違
一凡巡視學校水路乘驛舟陸路乘馬仍于本司帶書吏一名隨行陸路與官驢俱支廩給 一府州縣提調官員宜嚴束生徒不許出外遊蕩爲非凡學內殿堂齋房等屋損壞卽辦料量工修理若恃有提督憲職將學校中一切合行之事推故不行用心整理量加決罰懲戒 一所過之處遇有軍民利病及不材官吏貪酷害人事干奏請者從實奏聞 一本職專督學校不理刑名如有軍民人等訴告冤枉等事許受詞狀 一發下所在有司問理重則送按察司直隸送巡按御史提問

一科舉本古者鄉舉里選之法今南北所取舉人名數已有定制近年奔競之徒利他處學者寡少徃徃赴彼投充增廣生員詐冒鄉貫隱蔽過惡一槩應試所在教官僥倖以爲己功其弊滋甚今後不許違者聽本職及提調科舉官監試官拿問 一布政司按察司官及巡按御史不許侵越提督者職事若以公務至府州縣亦當勉勵師生動力學業不許推故不理若提督官行止不端許巡按監察御史指實奏聞 一所轄境內遇有衛所學校一體提調整理武職子弟悉令其習讀武經七書百將傳及操習武藝其中有能習舉業者亦聽科舉 一各處歲貢生員照例將食糧年深者嚴加考

試不必會官如果年深不堪充貢就便照例黜罷却以次者考充務要通曉文理方許起送赴部 一廩膳增廣生員已有定額廩膳有缺于增廣內考選學問優等者幫補增廣有缺於本處官員軍民之家選擇資質聰敏人物俊秀子弟補充不許聽信有司及學官徇私作弊若有額外之數須嚴加考選通曉文義者存留待缺不許將不堪者一槩存留躲避差徭 一古者鄉閭里巷莫不有學即今社學是也凡提督去處即今有司每鄉每里俱設社學擇立師範明設教條以教人之子弟年一考較擇取勤効仍免爲師之人差徭 一師主於學校一切事務並要遵依洪武間卧碑行不許故違

憲宗成化六年令貴州按察司分巡官兼理本處學校
孝宗弘治十七年令提學官有徇情將老病鄙猥之人濫
容在學及充貢者叅究黜罷

武宗正德十年給各按察司提督學校官關防 又令口
外衛學并各都司衛所土官學離本布政司寫遠提督
官不能歲歷者許各道分巡官歲加考校行提學官知
會

世宗嘉靖十六年題准大同所屬府州縣衛所儒學生員
俱令冀北道分巡官代理宣大俱令巡按御史帶管
二十六年議准甘肅各衛所儒學生員行甘肅巡按御
史帶管提調遇該科舉之年聽考送陝西布政司應試

今上萬曆三年換給提學官

勅諭

一聖賢以經術垂

訓

國家以經術作人若能體認經書講明學問何必

又別標門戶聚黨空談今後各提學官督率教官生儒
務將平昔所習經書義理着實講求躬行實踐以需他
日之用不許別創書院群聚徒黨及號召地方遊食無
行之徒空談廢業因而啓奔競之門開請托之路違者
提學官聽巡按御史劾奏遊食人拿問解發 一孝悌
廉讓乃士子立身大節生員中有敦本尚實行誼著聞
者雖文藝稍劣亦必量加獎進以勵頽俗若有平日不
務學業囑托公事或捏造歌謠興滅詞訟及敗倫傷化
惡過彰著者體訪得實不必品其文藝即行革退不許

徇情姑息亦不許輕信有司敎官開送致被挾私中傷
誤及善類 一我 聖祖設立卧碑天下利病諸人皆
直言惟生員不許今後生員務遵 明禁除本身切已
事情許家人抱告有司從公審問倘有冤抑即爲昭雪
其事不干已輒便出入衙門陳說民情議論官員賢否
者許該管有司申呈提學官以行止有虧革退若糾衆
扛幫聚至十人以上罵詈官長肆行無禮爲首者照例
問遣其餘不分人數多少盡行黜退爲民 一國家明
經取士說書者以宋儒傳註爲宗行文者以典實純正
爲尚今後務將 頒降四書五經性理大全資治通鑑
綱目大學衍義歷代名臣奏議文章正宗及當代 誥

律典制等書課令生員誦習講解俾其通曉古今適于世用其有剽竊異端邪說炫奇立異者文雖工弗錄所出試題亦要明白正大不得割裂文義以傷雅道

提學官奉 勅專督學校不許借事枉道奔趨撫按官于求薦舉各撫按二司官亦不許侵伊職掌行事若有不由提學官考取徑自行文給與生儒衣巾及有革退生員赴各衙門告訴復學者即將本生問罪革黜若提學官有行止不端怠玩曠職者許巡按御史指實劾奏

一該管地方每年務要巡視考校一遍不許移文代委及于隔別府分調取生儒以致跋涉爲害亦不許令師生匍匐迎送考畢即于本地方發落明示賞罰不許

攜帶文卷于別處發案致令書吏乘間作弊士子無所
勸懲亦不許招邀詩朋酒友遊山翫水致啓僥門妨廢
公務其水陸夫馬廩給隨帶吏書俱照常行 一提學
官巡歷所屬凡有貪汙官吏軍民不法重情及教官干
犯行止者原係憲司理當拿問但不許接受民詞侵官
喜事其生員犯罪或事干對理者聽該管衙門提問不
許護短曲庇致令有所倚恃抗拒公法 一廩膳增廣
舊有定額迨後增置附學名目冒濫居多今後歲考務
要嚴加校閱如有荒踈庸耄不堪作養者即行黜退不
許姑息有捏造流言思逞報復者訪實拿問照例問遣
童生必擇三場俱通者始收入學大府不過二十人大

州縣不得過十五人

十一年題准人才衆多地方就試

人衆許酌量增取但不許徇私過濫

如地方乏才即四

五名亦不爲少若鄉宦勢豪干托不遂暗行中傷者許

徑自奏聞處治

一兩京各省廩膳科貢皆有定額近

來有等奸徒利他處人才寡少往往詐冒籍貫投充入

學及有詭寫兩名隨處告考或假捏士大夫子弟希圖

進取或原係娼優隸卒之家及曾經犯罪問革變易姓

名援例納粟等項僥倖出身殊壞士習訪出嚴行拿問

革黜若教官納賄容隱生員扶同保結者一體坐罪

一府州縣提調官員宜嚴束生徒按季考校凡學內殿

堂齋房等屋損壞即辦料量工修理其齋夫膳夫學糧

學田等項俱要以時發給不許遲悞尅減 一生員之家依洪武間例除本身外戶內優免二丁差役 一生員考試不諳文理者廩膳十年以上發附近去處充吏 六年以上者發本處充吏增廣十年以上發本處充吏 六年以上者罷黜爲民 一儒學教官士子觀法所係按臨之日考其學行俱優者禮待獎勵其行履無過但學問疎淺者一次考驗姑行戒飭再考無過送吏部別用有老病不堪者准令以禮致仕若卑汙無耻素行不謹者不必試其文學即拿送按察司問革 一考貢照近日事例每歲預將次年應貢生員限年六十以下三十以上屢經科舉者六人嚴加考選取其優者充貢後

題准考貢止用一正一陪定限次年四月到部聽候

廷試文理不通者即行停降年老衰憊者姑授以冠帶
榮身不許但挨次濫貢其有停廩降廩者必考居一二
等方許收復

十二年題准停廩降廩者考居三等亦准

復未收復者不許起送應貢如有濫貢及 廷試發回

五名以上提學官照例降調 一補貢有缺務查人文

未經到部果在一年以裏者將原給批咨朱卷追繳方
取年力精壯文學優長者一人補貢定限該貢年分次
年到部方准收考如有不遵舊例將年遠貢缺濫補市
恩者起送到部即將本生發回革廩肄業提學官察究
一過鄉試年分應試生儒名數各照近日題准事例

每舉人一名取科舉三十名此外不許過多一名兩京
監生亦依解額照數起送有多送一名者各監試官徑
行裁革不許入場 一名宦鄉賢孝子節婦及鄉飲禮
賓皆國之重典風教所關近來有司忽于教化學校是
非不公濫舉失實激勸何有今後提學官宜以綱常爲
已任遇有呈請務須核具非年久論定者不得舉鄉賢
名宦非終始無議者不得舉節婦孝子非鄉里推服者
不得舉鄉飲賓僕如有妄舉受人請求者師生人等即
以行止有虧論其從前冒濫混雜有玷明典者照近例
徑自查革 一所轄境內有衛所學校一體提調整理
武職子弟悉令習讀武經七書百將傳及操習武藝有

願習舉業者聽社學師生一體考校務求明師責成量
免差役其行止有虧及訓誥句讀音韻差謬字畫不端
不通文理者即行革退

四年令各處鄉試畢日吏部會同禮部將各提學官從
公考察分別等第優異降調有差 六年題淮南直隸
廬鳳淮陽四府滁徐和三州學校以江北巡按兼之湖
廣衡永二府柳州以上湖南道副使兼之辰州一府靖
州以辰沅道副使兼之廣東瓊州府以海南道副使兼
之各請專 勅行事每歲巡歷考校 十年題准鄉試
後提學官考察停止 十一年題准各提學每歲考校
一次入學務要不失原額間有他故巡歷不周次年即

行如數補足雖係科舉之年亦宜照歲考例總計三年之內大府務足六十人大州縣務足四十五人其地方果係科目數多就試人衆則于定額之外量加數名但不許倍于原數如乏才之處亦毋得因而一槩取盈十二年令南直隸提學御史仍兼管江北湖廣提學官照舊專管該省惟瓊州府仍屬海南道

社學

太祖洪武八年 詔有司立社學延師儒以教民間子弟十六年 詔民間立社學有司不得干預其經斷有過之人不許爲師 二十年令民間子弟讀 御製大誥者赴京禮部較其所誦多寡次第給賞又令兼讀律

令

英宗正統元年令各處提學官及司府州縣官嚴督社學不許廢弛其有俊秀向學者許補儒學生員

憲宗成化元年令民間子弟願入社學者聽貧乏不願者勿強

孝宗弘治十七年令各府州縣建立社學訪保明師民間幼童年十五以下者送進讀書講習冠婚喪祭之禮

宗學

武宗正德十四年令吏部于各王府長史紀善伴讀教授等官務擇學行優長堪爲師範者除授凡世子衆子長子將軍中尉等年未弱冠者各隨資脩嚴立課程

教養如法不得虛應故事撫按提學等官訪其賢否勤惰以聞

今上萬曆十年題准凡宗室之子年十歲以上俱入宗學其師即以本府教授紀善等官選取學行俱優者充之若宗生衆多則置教師或于宗室中推舉一人爲宗正王領其事各生誦習皇明祖訓孝順事實爲善陰騭等書至于四書五經史欽性理亦相兼講讀俟年至十五許照例請封先給祿米三分之一仍習學五年驗有進益親王方與奏請出學支本等全祿嘉靖十四年例另城者該府郡王或管理府事者奏請其有放縱不循禮守法者學師具啓各該親郡王小則徑自訓

責大則參奏降革

醫學

皇明除在京設太醫院外各王府設良醫所良醫正正

八品副從八品

各府設醫學正科從九品州設典科

縣設訓科俱未入流各率醫主療治疾疫及犴獄囚人患病諸務

陰陽學

皇明除在京設欽天監外各府設陰陽學正術從九品

州設典術縣設訓術俱未入流各率陰陽生主申報雨

澤救護日月諸務

續文獻通考卷之六十終